

INUIT ATAQATIGIIT

Inatsisartuni



UKA 2018/197 og 198
03.10.18.
Stine Egede

Qamutit motorillit akileraarutaat pillugit Inatsisartut inatsisaata allangortinneqarneranik Inatsisartut inatsisaat nr. xx, xx. xxx 2018-imeersoq. (Qamutit motorilinnut taamaallaat innaallagissamik brintimilluunniit ingerlatilinnut plug-in hybridbiilinnut akitsuut kiisalu igitassanngortitsinermit akiliut)

(Aningaasaqarnermut Naalakkersuisoq)

Kiisalu

Eqqussinermit akitsuutit pillugit Inatsisartut inatsisaata allangortinneqarera pilugu Inatsisartut inatsisaat nr. Xx, xx. Xxx 2018-imeersoq. (Plug-in hybridbiilit akitsuutaat, biilinnut innaallagissamik imaluunniit brintimik ingerlatilinnut akitsuummik akiliisussaanninneq kiisalu qamutit motorillit nunaannakkoortit minnerusut akitsuutaannik atorunnaarsitsineq)

(Aningaasaqarnermut Naalakkersuisoq)

Naalakkersuisut aalajangiiffigisassatut siunnersuutaannut qulaani pineqartunut, Inuit Ataqatigiinniit matumuuna siullermeerinninnermit imaattumik oqaaseqaateqassaagut.

Inuit Ataqatigiinni sulluunniit mingutsitsinermit kingunillit akuersaagarinnilavut. Taamaattumik akitsuummik atulersitsinissamik Naalakkersuisut siunnersuuteqarnerat piffissaasorinngilarput.

Annilaanngatigaarpummi maanna akitsuusiinerit tamakkiisut eqqunneqassagualuarpata, biilinnik mingutsitsinngitsunik pisiortorneq annikitsuaranngorsinnaammatt unilluinnarsinnaammalluunniit, nalunngilarput siunnersuutip matuma saqqummiunneqarnerata kingunerisaanik biilinnik pineqartunik pisiortorneq unilluinnangajassimammatt. inuit biilinnik nalinginnaasunik uuliamik benzinamillu ikummatilinnik piserusunnerupput, tamannalu siunissamik mingutsitsinnginnerusumik taallugu anguniagaqarnitsinnut naapertuutinngilaq.

Inuit Ataqatigiinniit siunnersuutigineqartuni § 2, imm. 1-imi taagorneqartut, tassalu aqqusinermit angallannermit akitsuutit, affaannanngorlugit

pilersinneqarsinnaaneri kaammattuutigissavarput, imaluunniit inatsisissap pilerseqqaarneranit siunnersuutigineqartoq akitsuut naapertuunnerusoq.

Isumaqarpuguttaaq piffissaanngitsoq biilit pineqartut pillugit eqqussinermi akitsuut maanna atuutilertissallugu. Nuna tamaat isigalugu biilit pisoqalisut, mingutsitsisullu amerlanerusut taarserneqarsimaleriarpata taanna uterfigeqqinneqarsinnaavoq.

Innaallagissamik orsersortarfinnik misileraanerit inernerisa nalilersorneqarnerisa inerneris aamma qanoq atorluarneqarsimatiginersut paaserusunnassapput.

Tusarniaanerit atuaraanni oqariartuutaat assigiittorujussuuvoq, mingutsitsinnginnissamik amerlanerit tamarmik oqariartuuteqarput.

Qamuteralannut ATV-nut UTV-nullu eqqussinermi akitsuutaarutsitsiniarneq Inuit Ataqaatigiinnit isumaqatiginngilarput. Isumaqarpugut Eqqussinermi akitsuut taakkununga tunngatillugu atuutiinnassasoq.

Illuanilli aqqusinnermi angallannermi akitsuusiisarneq annikillineqassasoq, ATV-it aamma UTV-it eqqarsaatigalugit. Oqimaassusaat apeqqutaatinngikkaluarlugu, assersuutigalugu ukiumut ataasiarluni akiligassamik naapertuunnerusumik akitsuuserlugit. Ajoraluartumik ullumikkut normulerneqanngitsorpasuit ingerlaarput, tamannalu aamma amerlasuutigut isumaqarpoq sillimaserneqannginnerinik. Ajutoortoqarneranimi aatsaat tamanna paasineqartarpoq. Aqqusinikkut angallannermi qamutit motoorillit sillimaserneqartussaasarmata, tamatumani nakkutiginnissinnaaneq qularnaannerusoq pissappat normoqartariaqarneri pinngitsoorsinnaanngilaq.

Nunaqarfinni uumasuuteqarfiusuni, piniartunilu assartuinnermut atuiffiusuni aqqusinnermi angallannermi akitsuutinik annikilliliinissaq isumaqataaffigaarput.

Mianersorfissaasoraarpulli akitsuutinik tamanik paaassagaluarutta killeqanngitsumik atugaalernissaat aamma illoqarfinni, tassami qamutit taamaattut atoruminartuupput, kalittaaserlugit atorluarneqarsinnaasorujussuullutik, ingammik UTV-it nukittummata, aquttarfiilu matuneqarsinnaallutik. Eqqaasitsissutigerusunnarporlu ATV-it nunakkut angallatigiuminartuunertik pissutigalugu nunamut sumorujussuaq angallatigineqarsinnaammata ajoraluartumillu aqqummini nunamik aserorteringaatiartarlutik assakaasuisa ilusaat pissutaallutik.

Igitassanngortitsinnermi akiliutissatut siunnersuut tunngaviatigut isumaqatiginarpoq, taannalu aamma oqaloqataaffigissavarput.

Isumaqatiginarportaaq angallannermut akitsuummi akiliinissamut ullussarititaasoq kingulleq siunnersuutigineqarmat 30. April aamma 31. Oktoberimut allanngortinneqassasoq.

Taamatut Inuit Ataqatigiiniit oqaaseqarluta, ataatsimiisitaliamut susassaqartumut ingerlateqqinneqarnissaa inassuteqaatigaarput.

Qujanaq